

आकाशवाणी जयपुर-अजमेर
प्रादेशिक समाचार
दिनांक : 10.03.2026 समय : 18.45 बजे

- केन्द्रीय मंत्रिमंडल जल जीवन मिशन री मियाद दिसंबर 2028 ताई बधावण री मंजूरी दीनीं
- केंद्र सरकार आतूणी एशिया मांय उपजा हालात ने ध्यान राखता थकां देश मांय आवश्यक वस्तु कानून-1955 लागू कीनीं
- विधानसभा राजस्थान नगरपालिका संशोधन बिल-2026 ध्वनिमत ऊं पास कीनीं- सत्र बेमियादी बगत सारू टाळी ज्यो
- राज्य मांय चणा अर सरसों री सरकारी मोल माथे खरीदी सारू 15 मार्च ऊं ऑनलाइन तरीका ऊं नाम मंडाया जा सकेलां

000

केन्द्रीय मंत्रिमंडल जल जीवन मिशन री मियाद दिसंबर 2028 ताई बधावण री मंजूरी दे दीनी हैं प्रधानमंत्री नरेन्द्र मोदी री सदारत मांय आज व्ही मीटिंग मांय ई बाबत प्रस्ताव ने मंजूरी दीरीजीं सूचना अर प्रसारण मंत्री अश्विनी वैष्णव नई दिल्ली मांय बतायो के अब ई मिशन मांय बुनियादी ढांचा री बजाय सेवा मुहैया करावण माथे खास ध्यान दियो जावेलां

.....
जल जीवन मिशन सारू 8 लाख 69 हजार करोड़ रुपया रो बजट ई मंजूर करी ज्यो है, जिण मांय केंद्र सरकार रो हिस्सो 3 लाख 59 हजार करोड़ रुपया व्हेलां मिशन सारू "सुजलम् भारत" नाम रो राष्ट्रीय डिजिटल ढांचो बणायो जावेला, जिण रा तैत हर गाँव ने खास "सुजल गाँव" या "सर्विस एरिया आईडी" दी जावेलां इण ऊं पाणी ने स्रोत ऊं टूटी ताई पूगावण री पूरी व्यवस्था री डिजिटल मैपिंग करी जा सकेलां

000

केंद्र सरकार आतूणी एशिया मांय तणा-तणी रा मौजूदा हालात ने ध्यान राखता थकां देश मांय आवश्यक वस्तु कानून-1955 रा प्रावधान लागू कर दिया ज्यो हैं पेट्रोलियम अर प्राकृतिक गैस मंत्रालय कानी ऊं जारी अधिसूचना रे मुजब ई फैसला रो मकसद गैस री लगातार पूर्ति तैय करण अर जमाखोरी माथे रोक लगावणो हैं सरकार सीएनजी री उपलब्धता अर वितरण री प्राथमिकतावां तय करण सागे तेल शोधन कारखानां ने बत्तो तेल काडण रा हुकम दीना हैं राज्य मांय ई जनता ऊं कालाबाजारी रा मामलां री जाणकारी देवण री अपील करीजी हैं पाली रा जिला रसद अधिकारी कमल बतायो के जिला मांय ऑनलाइन बुकिंग रे जरिये पांच ऊं सात दिन मांय गैस री टंकियां घर पूगावणो तैय कर्यो जावेलां

.....
तेल कम्पनियां इंडियन ऑयल कॉर्पोरेशन लिमिटेड, हिन्दुस्तान पेट्रोलियम कॉर्पोरेशन लिमिटेड अर भारत पेट्रोलियम रसोई गैस रो उत्पादन बधावण अर घरेलू ग्राहकां, अस्पतालां अर शैक्षणिक संस्थानां सरीखी जरूरी ठौड़ां गैस री सप्लाई बणायी राखण सारू जरूरी जतन कर रही हैं तेल कम्पनियां कानी ऊं सोशल मीडिया रे जरिये बतायी ज्यो के आं रे अलावा दूजां कानी ऊं मिली अर्जियां माथे तेल कंपनियां रा कार्यकारी निदेशकां री समिति कानी ऊं फैसलो कर्यो जावेलां

000

आतूणी एशिया मांय चाल रही तणा-तणी बीचे भारत रा ई केई लोग देश मांय पाछा आ रह्या हैं सैर-सपाटा सारू संयुक्त अरब अमीरात मांय दुबई गयो भीलवाड़ा रो एक जोड़ो सकुशल वापसी सारू प्रधानमंत्री नरेन्द्र मोदी अर केंद्र सरकार रो आभार जतायो हैं मिसाइल अर ड्रोन हमलां रे कारण व्ह्या

धमाकां अर धुआं ऊं घबरायो जोड़ो वटे भारत रा दूतावास अर विदेश मंत्रालय ऊं मदद मांगीं पाछा आया रौनक बाहेती कह्यो के भारत री मजबूत विदेश नीति अर सरकार री कोशिशं ऊं वे 5 मार्च ने पाछा भारत आ सक्यां

.....
विधानसभा आज राजस्थान नगरपालिका संशोधन बिल— 2026 पास कर दीनों स्वायत्त शासन मंत्री झाबर सिंह खर्वा रा जवाब पाछे सदन इण ने ध्वनिमत ऊं मंजूरी दे दीनीं ओ कानून बण्यां पाछे दो ऊं बत्ती संतान वाळा ई नगर निकाय रा चुनाव लड़ सकेलां बिल माथे चर्चा रे दौरान विधायक डूंगरराम गेदर, घनश्याम मेहर, नरेन्द्र बुढानिया अर हरिमोहन शर्मा ई वां री बात रख्यीं सदन महाराणा प्रताप खेल विश्वविद्यालय 2026 बिल ई पास कर दीनों बिल पास व्ह्यां पाछे विधानसभा अध्यक्ष वासुदेव देवनानी सदन री कार्यवाही बेमियादी बगत सारू टाळ दीनीं

000

प्रदेश मांय सरसों अर चणा री सरकारी मोल माथे खरीदी सारू 15 मार्च ऊं नाम मंडाया जा सकेलां पैली राजफैड रा कोटा, अजमेर, भरतपुर अर श्रीगंगानगर दपतरां मांय नाम मंडाया जा सके हैं सहकारिता राज्य मंत्री गौतम कुमार दक बतायो के खरीदी रो काम 25 मार्च ऊं सरू कर्यो जावेलां दक बतायो के जयपुर, जोधपुर, उदयपुर अर बीकानेर मांय ऑनलाइन तरीका ऊं 20 मार्च ऊं नाम मंडाया जा सकेलां आं केन्द्रां माथे सरकारी मोल ऊं खरीदी एक अप्रैल ऊं सरू करी जावेलां मंत्री बतायो के सरसों रो सरकारी मोल 6 हजार 200 रुपया प्रति क्विंटल अर चणा रो सरकारी मोल 5 हजार 875 रुपया प्रति क्विंटल व्हेवण रो ऐलाण करी ज्यो हैं राज्य मांय 13 लाख 78 हजार मीट्रिक टन सरसों अर 5 लाख 53 हजार मीट्रिक टन चणा री खरीदी तैय करी ज्यी हैं

000

केंद्रीय वाणिज्य अर उद्योग मंत्री पीयूष गोयल आज नई दिल्ली मांय आहार अंतर्राष्ट्रीय खाद्य अर आतिथ्य मेळा रो उद्घाटन कीनों श्री गोयल खबरनवीसां सागे बातचीत करता थकां कह्यो के भारत दिसावर मांय सामान बेचण वाळो दुनिया रो सातवों मोटो देश हैं

.....
राज्य सरकार कृषि उपज मण्डी प्रांगण भूमि अर्जन नीति ने मंजूरी दे दीनी हैं इण रो मकसद मण्डियां रा विकास सारू भूमि अर्जन री प्रक्रिया ने व्यवस्थित बणावणो हैं सरकार कृषि उपज मण्डियां मांय विकास रा कामां सारू 22 करोड़ रुपया ऊं बत्ती रकम मंजूर दीनी है

000

साल 2026 रा पद्म श्री ईनाम ऊं नवाजण सारू नामित गफरुद्दीन मेवाती जोगी प्रधानमंत्री नरेन्द्र मोदी अर भारत सरकार रो आभार जतायो हैं खबरनवीसां सागे बातचीत करता थकां जोगी कह्यो के ओ मान वां री लोक कला अर मेवाती संस्कृति सारू माथो ऊंचो करण वाळो हैं

.....
ध्यानजोग है के गफरुद्दीन मेवाती जोगी ने कला रा हलका मांय खास योगदान सारू पद्म श्री पुरस्कार ऊं नवाजण रो प्रस्ताव करी ज्यो हैं

000

सीळी आठां काल मणायी जावेलां इण ऊं पैली आज रांधा—पोआ करी ज्यां ई दौरान शीतला माता रे भोग लगावण सारू पकवान बणाया जा रहया हैं कठे—कठे आज ई सीळी—सातां पूजी ज्यीं शीतला माता ने एक दिन पैली बणायी ज्या ठण्डा भोजन रो भोग लगायो जावे हैं इण ने बास्योड़ा ई कह्यो जावे हैं जालौर जिला मांय आज केई ठौड़ां शीतला माता रा मिन्दरां मांय मेळा भर्यां वटे गेर नाच रो दरसाव ई करी ज्यो जोधपुर मांय कागा रा जूना शीतला माता मिन्दर मांय आज सिज्यां नौ दिन रो मेळो सरू व्हे रह्यो हैं जयपुर कने चाकसू रा शील की डूंगरी मांय काल शीतला माता रो मेळो भरेलां

000

भरतपुर रा जूना बांध बारैठा रो बूतो बधावण सारू जूना दरुजा बदल्या जावेलां सिंचाई विभाग रे मुजब आठ री ठौड़ 12 दरुजा बणावण सागे बंधा री भींत और ऊंची करी जावेलां ई बंधा ऊं भरतपुर शहर, 28 गांवां, 12 पंचायतां अर केवलादेव राष्ट्रीय उद्यान ने पीवण रा पाणी री पूर्ति करी जावे हैं फिलहाल इण रो भराव 1860 एमएसएफटी हैं

000

कुंभलगढ़ टाइगर रिजर्व ने और मोटो बणावण सारू राजसमंद, पाली अर ब्यावर जिलां मांय ज़मीं तैय कर लीरीजी हैं वन राज्य मंत्री संजय शर्मा आज प्रश्नकाल रे दौरान विधानसभा मांय आ जाणकारी दीनीं श्री शर्मा बतायो के महकमो एनटीसीए ने नुवो प्रस्ताव भेज दीनो हैं वे कह्यो के टाइगर रिजर्व रो ऐलाण व्ह्यां पाछे ई हलका मांय सैलाणियां री तादाद बधेला जिण ऊं लोगां ने काम-धंधा रा और मौका मिलेलां कुंभलगढ़ अर टॉडगढ़ अभयारण्य मांय सैर-सपाटा ने बधावो देवण सारू 'कालीघाट ऊं भीलभेरी' अर 'फुलास ऊं गोरम घाट' ताई नुवा सफारी मार्ग ई बणावण रो प्रस्ताव करी ज्यो हैं

000

राज्य मांय हरियाळो राजस्थान" मिशन रा तैत आवता चौमासा मांय 10 करोड़ पौधा रोपणो तैय करी ज्यो हैं वन अर पर्यावरण विभाग रा अतिरिक्त मुख्य सचिव आनंद कुमार जयपुर मांय राख्यी ज्यी मीटिंग मांय इण रा काम रो जायजो लीनों मिशन रा तैत साल 2024 ऊं 2028 ताई राज्य मांय 50 करोड़ पौधा रोपणो तैय करी ज्यो हैं पौधा रोपण सारू 31 मार्च ताई ठौड़ो तैय करी जावेला जठे जुलाई ऊं सितंबर बीचे पौधा रोप्या जावेलां ई काम री राज्य, जिला अर उपखंड लेवल माथे निगराणी राखण सारू टास्क फोर्स बणायी जावेलां पौधा रोपण री जाणकारी "हरियाळो" ऐप माथे अपलोड करएर रा हुकम दिया ज्यो हैं ध्यानजोग है के वन विभाग री नर्सरियां मांय साल 2026-27 सारू 626 लाख ऊं बत्ता पौधा तैयार कर्या जा रह्या हैं

000